

Reykjavík, 20. ágúst 2012.

Kynning á samræmdum könnunarprófum í 4. bekk 2012

Ágæti nemandi.

Í haust tekur þú í fyrsta sinn samræmd könnunarpróf. Samræmd könnunarpróf eru lögð fyrir nemendur í 4., 7. og 10. bekk að hausti ár hvert. Prófin í 4. bekk verða lögð fyrir dagana 20. og 21. september, fyrst íslenska svo stærðfræði. Hér á eftir eru upplýsingar og leiðbeiningar svo þú áttir þig betur á prófunum og ekkert þurfi að koma á óvart við próftökuna.

Hvað eiga prófin að mæla? Markmið prófanna er aðallega tvíþætt. Í fyrsta lagi að gefa upplýsingar um að hvaða marki þú hefur náð grundvallarkunnáttu og færni sem frekara nám byggir á. Í öðru lagi að vera foreldrum, kennurum og skólayfirvöldum til leiðbeiningar um námsstöðu þína.

Hvernig er prófunum háttað?

Mæting: Samræmd könnunarpróf hefjast klukkan 9:00. Skólinn ákveður hvenær nemendur eiga að mæta. Áður en próf geta hafist þarft þú að koma þér fyrir, merkja prófgögn og kennari að taka manntal. Prófin eru í tveimur jafnlöngum lotum sem hvor um sig er 60 mínútur að lengd. Tuttugu mínútna hlé er á milli próflota.

Undirbúningur: Það er mikilvægt að þú mætir í prófin með því hugarfari að tilgangur þeirra sé að meta stöðuna í viðkomandi námsgreinum. Alla jafna kynna skólar nemendum prófin og láta þá þreyta eldri próf í æfingarskyni. Ekki er ástæða til að skapa mikla streitu vegna þeirra. Mikilvægt er að vera vel sofinn og að borða morgunverð fyrir prófin. Gert er ráð fyrir að nestis sé neytt í hléi milli próflota.

Á meðan á prófum stendur: Þú átt að skrifa nafn þitt og skólans á prófheftin. Ef búið er að setja límmiða á prófheftin skaltu athuga hvort það er nafn þitt sem stendur á miðanum. Mikilvægt er að vinna jafnt og þétt í prófinu.

Yfirlit um hvort próf fyrir sig:

Íslenska

Íslenskuprófið skiptist í stafsetningu, ritun, lestur og málnotkun. Að auki er lesskimun lögð fyrir einhvern daganna fyrir samræmda prófið.

Fyrri lota prófsins byrjar á því að stafsetningarverkefni er lesið upp. Þá skrifar þú orð eftir upplestri. Síðan eru verkefni í lestri, málnotkun og ritun sem þú vinnur sjálf/ur. Í seinni lotu er lestur og málnotkun. Í lestri eru stuttar sögur og spurningar úr þeim. Í málnotkun eru spurningar um orð eða setningar.

Stærðfræði

Í stærðfræði er eitt prófhefti fyrir hlé og annað eftir hlé. Óheimilt er að nota vasareikni í fyrri hlutanum en hann má nota í seinni hlutanum. Mikilvægt er að sýna útreikninga þótt vasareiknir sé notaður. Þú skráir hvað þú ert að gera og útkomu þar sem við á. Meginreglan er að opin dæmi vega tvö stig. Í opnum dæmum eru gefin stig fyrir áfanga að rétttri lausn. Því er mjög mikilvægt fyrir þig að sýna vinnu þína í prófheftinu.

Fyrir hönd Námsmatsstofnunar



Sigurgrímur Skúlason



NÁMSMATSSTOFNUN

Reykjavík, 20. ágúst 2012.

Ágæti forráðamaður.

Þann 20. og 21. september næstkomandi verða samræmd könnunarpróf lögð fyrir í 4. bekk grunnskóla. Prófað verður í íslensku þann 20. september og stærðfræði þann 21. september.

Markmið prófanna er aðallega tvíþætt. Í fyrsta lagi að gefa upplýsingar um að hvaða marki nemendur hafa náð grundvallarkunnáttu og færni sem frekara nám byggir á. Í öðru lagi að vera foreldrum, kennurum og skólafyrirvöldum til leiðbeiningar um námsstöðu nemenda. Með því að leggja samræmd könnunarpróf fyrir að hausti, gefast tækifæri til að nýta niðurstöður þeirra við skipulagningu náms og kennslu.

Prófin hefjast klukkan 9:00 og þurfa nemendur að mæta á þeim tíma sem skólinn ákveður. Talsverður munur er á þroska og getu barna á þessum aldri sem reynt er að mæta með rúmum próftíma. Eldri próf eru aðgengileg á vefsvæði Námsmatsstofnunar, http://www.namsmat.is/vefur/samr_prof/grunnskolar/samramd.html.

Efni samræmdra könnunarprófa miðast við aðalnámskrá grunnskóla, einkum námsmarkmið sem ætluð eru 2. og 3. bekk. Aðalnámskráin dregur fram meginlínur í námi en skólar hafa sveigjanleika í útfærslu á henni og einnig er námshraði einstakra nemenda breytilegur. Samræmd könnunarpróf taka mið af þessu og er efni þeirra því mjög fjölbreytt.

Nokkrar tegundir einkunnna verða notaðar á samræmdum könnunarprófum. Nemendur fá eina heildareinkunn fyrir hvort próf og jafnframt eina einkunn fyrir hvern námsþátt í prófi. Nemendur fá samræmdar einkunnir sem eru hefðbundnar einkunnir. Þeir fá einnig raðeinkunn sem sýnir stöðu nemenda miðað við allan árganginn, markbundna einkunn sem tengd er við markmið aðalnámskrár og dæmigerð prófverkefni sem nemendur hafa vald á. Að síðustu eru notaðar normaldreifðar einkunnir við ýmsa útreikninga og skýrslugerð.

Mikilvægt er að nemendur séu vel upplagðir, hafi fengið góðan nætursvefn og borðað morgunmat að morgni prófdaga. Gert er ráð fyrir að nestis sé neytt í hléi milli próflota. Einhver röskun getur orðið á skólastarfi þessa daga.

Einkunnir nemenda verða sendar til skóla í lok október og í framhaldi af því eiga forráðamenn að fá einkunnir barna sinna sendar heim frá skólunum. Ekki er ástæða fyrir foreldra að undirbúa börnin sérstaklega fyrir prófin enda eru þau hluti af hefðbundnu skólastarfi og ætlað að meta námsstöðu nemenda.

Lesskimun er hluti af samræmdu könnunarprófi í íslensku fyrir 4. bekk. Skimað er fyrir lestrarvanda með verkefnum sem reyna á hljóðvitund, málskilning og minni. Er fyrirlögn þessa hluta stýrt með upplestri af geisladiski. Ekki er gefin einkunn fyrir lesskimunina, heldur einungis umsögn sem kemur fram á einkunnablaði. Lesskimun er lögð fyrir dagana á undan samræmdu prófunum.

Fyrir hönd Námsmatsstofnunar



Sigurgrímur Skúlason